

Was merr so babbelt

Willsde nochen Schluck?

Hm ...

Obsde nochen Schluck Kaffee willst?

Hm ...

Was issen im Blättche so intressont?

Ja.

Was heeßt Ja?

Ich will nochen Schluck.

Jetzt isser all.

All? Wieso?

Weil icken jetzt gedrunke habb.

Doo hättde mich nit ze frooche brauche.

Du host joo koo Antwort gewwe.

Ich habb Ja gesacht.

Awwer doo hatten ich schon gedrunke.

Iss joo gut. Koche merr halt noch e Tass.

Wennde lese dust siehsde unn heersde nix.

Ich habbs geheert unn habb Ja gesacht.

Hosde aach geheert, was ich sunnst noch ...

Ich habb alles geheert!

Aach was ich sunnst noch gefroocht habb?

Was hosden noch gefroocht?

Obde doi Tablette genumme host.

Host du mich gefroocht?

Ja, dess habb ich.

Unn was habb ich zur Antwort gewwe?

Nix.

Ich habb Nix gesacht?

Du host nix zur Antwort gewwe.

Ich sach doch nit Nix, wenn du mich froochst,

ob ich moi Tablette genumme habb.

Du host nit Nix gesacht, du host nix gesacht.

Heeßt dess, ich hätt koo Antwort gewwe?

Genau dess heeßts. Unn?

Was unn?

Hosde se genumme odder nit?

Zwaa Stick habb ich genumme.

Was stehden im Blättche dassde nix heerst?

Ich les dess grad von de Galf.

Dess mett dene Plakate?

Ja dess. Dasse geklaut worrn sinn.

Geklaut! - die hott ooner fortgeschmisse!

Glaab ich aach. Geschiehden recht.

Misse die aach allsfort protesdiern.

Die von de Galf verstehns halt nit.

Was verstehn die nit?
Die Leit wolle feiern unn nit protesdiern.
Unn wenn die Leit nit feiern?
Protesdiern se aach nit.
Noch nit emol geeche de Fluchlärm?
Naa, geeche den schunn gar nit.
Unn was moonsde warum nit?
Weilse ihr Ruh hawwe wolle.

Eiern Honnes